





唐詩紀事卷第四

王珪

褚亮

虞世南

蔡允恭

許敬宗

劉孝孫

魏徵

楊師道

岑文本

李百藥

來濟

長孫無忌

杜正倫

馬周

李義府

陳子良

杜之松

崔善為

王績

王珪

詠漢高祖云漢祖起豐沛乘運以躡鱗手奮三尺劍西  
滅無道秦十月五星聚七年四海賓高抗威宇宙貴有  
天下人憶昔與項王契濶時未伸鴻門既薄蝕滎陽亦



唐言卷之四  
蒙塵蟻虱生介冑將卒多苦辛爪牙驅信越腹心謀張  
陳赫赫西楚國化為丘與榛

詠淮陰侯韓信云秦王日凶慝豪傑爭共亡信亦胡為  
者劍歌從項梁項羽不能用脫身歸漢王道契君臣合  
時來名位彰北討燕承命東驅楚絕糧斬龍堰灘水擒  
豹潛夏陽功成享天祿建旗還南昌千金答漂母百錢  
酬下鄉吉凶成糾纏倚伏難預詳弓藏狡兔盡慷慨令  
心傷

珪字叔玠相太宗母李最賢老杜詩有我之曾老姑爾  
之高祖母謂李也

### 褚亮

字希明錢塘人警敏工為詩貞觀中為散騎常侍武德  
四年太宗為天策上將軍宮城西開文館下教以杜如  
晦房元齡于志寧蘇世長薛收褚亮姚思廉陸德明孔  
穎達李玄道李守素虞世南蔡允恭顏相時許敬宗薛  
元敬蓋文達蘇勛並以本官為學士收卒以劉孝孫補  
之使亮為贊

奉和詠日午詩云曦車日亭午浮箭未移暉日光無落  
照樹影正中圍草萎者稍靡葉燥望疑晞晝寢慙經笥  
暫解入朝衣



燭花詩云蘭逕香風滿梅梁暖日斜言是東方騎來尋  
南陌車靨星臨夜燭眉月隱輕紗莫言春稍晚自有鎮  
開花

賦蜀都詩云列宿光輿井分土跨梁岷沉犀對江浦駟  
馬入城闈英圖多霸跡歷選有名臣連騎簪纓滿含章  
詞賦新得上仙槎路無待訪嚴遵

秋鴈云日暮霜風急羽翮轉難任為有傳書意翩翩入  
上林

秋享送文舞用舒和歌云御宸合宮承寶曆帝圖王館  
奉明靈偃武修文九圍泰沉烽靜柝八荒寧

祀五方用舒和歌云笙歌箛舞屬年韶鷲鼓鳧鍾樂歲

豫調露初迎綺春節承雲遽踐蒼霄馭

樂府詞云高臺暫俯臨飛翼絳輕音浮光隨日度漾影

遂波深迫瞰周平野開懷暢遠襟獨此三休上還傷千

重心

奉和禁苑餞別應令詩云大蕃初錫瑞出牧邇皇京暫  
以綠車重言承未邸榮舒桃臨遠騎垂柳映軍營惠化  
宣千里威風動百城禁籞芳嘉節神襟餞送情金笳催  
別景玉管切離聲野花開且落山鳥哢還驚微臣夙多  
幸薄官奉儲明鈞臺暫作賦伊水濫聞笙懷德良知久



酬恩識命輕

和望月應魏王教詩云層軒澄皎月流照滿中天色共  
梁珠遠光隨趙璧圓影落臨秋扇輪虛入夜仙所欣東  
館裏預奉西園篇

虞世南

和鑿輿頓戲下詩云重輪依紫極前耀奉丹霄天經戀  
宸床帝命扈仙鑣乘星連鶴禁帶日下虹橋銀書迷曉  
色金輅轉晨颺霧徹軒營近塵暗苑城遙蓮花分秀萼  
竹箭下驚潮撫已慙龍幹承恩集鳳條瑤山盛風樂抽  
簡薦徒謠

侍宴應詔詩云芬芳禁林晚容與桂舟前橫空一鳥度  
照水百花燃綠野明斜日青山澹晚煙濫陪終燕賞握  
管類窺天

奉和詠日午詩云高天淨秋色長漢轉曦車玉樹陰初  
正桐圭影未斜翠蓋飛圓影明鏡發輕花再中良表瑞  
共仰璧輝賒

奉和月夜觀星應令詩曰早秋炎景暮初弦月彩新清  
風滌暑氣零露淨囂塵薄霧銷輕縠鮮雲卷夕鱗休光  
灼前曜瑞彩接重輪緣情摘聖藻並作命徐陳宿草誠  
踰濫吹噓偶縉紳天文豈易述徒知仰北辰



又春夜詩云春苑月徘徊竹堂侵夜開驚鳥排林度風  
花隔水來

凌晨早朝云萬戶宵光曙重簷夕霧收玉花停夜燭金  
壺送曉籌日暉青瑣殿霞生結綺樓重門應啓路通籍  
引王侯

詠舞詩云繁絃奏淥水長袖轉迴鸞一雙俱應節還似  
鏡中看

賦得吳都詩云畫野通淮泗星躔應斗牛玉牒宏圖表  
黃旗美氣浮三分開霸業萬里宅神州高臺臨茂苑飛  
閣跨沉流江濤如素蓋海氣似朱樓吳越自有樂還似

### 鏡中遊

賦飲馬長城窟云馳馬渡河干流深馬渡難前逢錦車  
使都護在樓蘭輕騎猶銜勒疑兵尚解鞍温池下絕棧  
澗道接危巒拓地勳未賞亡城律詎寬有月關猶暗經  
春隴尚寒雲昏無復影冰合不聞湍懷君不可遇聊持  
報一餐

賦鶴云飛來雙白鶴奮翼遠凌烟雙棲集紫蓋一舉背  
青天颺影過伊洛流聲入管絃鳴傳倒景外刷羽闔風  
前顧步已相失徘徊各自憐危心猶警露哀響詎聞天  
無因振六翮輕舉復隨仙



賦結客少年場云韓魏多奇節倜儻遺名利共矜然諾  
心各負縱橫意結友一言重相思千里至淶沈明月弦  
金絡浮雲響吹簫入吳市擊筑遊燕肆尋源博望侯結  
客遠相求少年垂一顧長驅背隴頭燄燄戈霜動耿耿  
劍虹潯天山冬夏雪交河南北流雲起龍沙暗木落鴈  
行秋輕生狗知己非是為身謀

怨歌行云紫殿秋風冷雕甍落日沉裁絢悽斷曲織素  
別離心掖庭若改畫長門不惜金寵移恩稍薄情踈恨  
轉深香銷翠羽帳絃斷鳳凰琴鏡前紅粉歇階上綠苔  
侵誰言掩歌扇翻作白頭吟

門有車馬客云陳尊重交結田蚡擅豪華曲臺臨上路  
高門抵狹邪赭汗千里馬繡轂五香車白鶴隨飛蓋朱  
鷺入鳴笳夏蓮開劍水春桃發綬花輕裾染回雪浮蟻  
泛流霞逢恩借羽翼失路委泥沙

擬古云塗山烽埃驚弭節度龍城冀馬樓蘭將燕犀上  
谷兵劍寒花不落弓曉月逾明凜凜嚴霜節冰杜黃河  
絕蔽日卷征蓬浮天散飛雪全兵值月滿精騎乘膠折  
結髮早馳驅辛苦事旌麾馬凍重關冷輪摧九折危獨  
有西山將年年屬數奇又燿火發金微連營出武威孤  
城塞雪起絕障虜塵飛俠客吸龍劍惡少縵胡衣朝摩



骨都壘夜解谷蠡圍蕭關遠無極蒲海廣難依沙磴離  
旌斷晴川候馬歸交河梁已畢燕山旆正揮方知萬里  
相侯服有光輝

顏師古隋朝遺事載洛陽獻合蒂迎輦花場帝令袁寶  
兒持之號司花女時詔世南草征遼指揮德音敕於帝  
側寶兒注視久之帝曰昔傳飛燕可掌上舞今得寶兒  
方昭前事然多慙態今注目於卿卿才人可便朝之世  
南為絕句學畫鴉黃半未成垂肩鞞袖大慙生緣慙却  
得君王惜長把花枝傍輦行

世南越州人太宗每稱其有五絕德行忠直博學文詞  
書翰也既卒帝曰世南於我猶一體拾遺補闕無日忘  
之蓋當代名臣人倫準的今其云亡石渠東觀中無復  
人矣

蔡允恭

允恭在隋時奉和出穎至淮詩云夕倦川涂曲忽此望  
淮圻波長泛淼淼眺迥情依依稍覺金烏轉漸見錦帆  
稀欲知仁化洽謳歌滿路歸

允恭荊州江陵人工為詩在隋時煬帝有所賦必令諷  
誦遣教宮人允恭耻之授內史舍人固辭繇是踈斥隋  
亡歸唐貞觀初除太子洗馬卒



許敬宗

奉和正月臨朝云天正開初節日觀上重輪百靈滋景  
祚萬土慶維新待旦敷玄造鞠旒御紫宸武帳臨光宅  
文衛象鈞陳廣庭揚九奏大帛麗三辰發生同化育播  
物體陶鈞霜空澄曉氣霞景瑩芳春德暉覃率土相賀  
奉還淳

奉和七夕應制云牛閨臨淺漢鸞駕涉秋河兩河縈別  
緒一宿慶停梭星嬌鈿裏曆月寫黛中娥柰許今宵度  
長嬰離恨多

又應制云牛閨期今夕娥輪泛淺潢迎秋伴暮雨待暝  
合神光薦寢低雲髮稱態解霓裳喜中怨漏促別後怨  
天長

七夕賦詠云一年抱怨嗟長別七夕含態始言歸颺颺  
羅機光天步灼灼新粧鑒月輝方迎巧笑開星靨不惜  
呈露解雲衣所歎却隨更漏盡掩淚還弄昨宵機

敬宗字延族杭州人太宗時檢校黃門侍郎高宗時中  
書令在唐史姦臣傳

劉孝孫

詠笛詩云涼秋夜鳴笛流風詠九成調高時慷慨曲變  
或淒清征客懷離緒鄰人思舊情幸以知音顧千載有



唐詩紀事卷四  
九  
高聲

早發成臯望河詩云清晨發巖邑車馬走輾轅迴瞰黃  
河上愴怳屢飛魂鴻流遵積石驚浪下龍門仙槎不辨  
處沉璧想猶存遠近洲渚出颯杳鳧雁喧懷古空延佇  
歎逝將何言

孝孫荊州人貞觀六年遷太子洗馬未拜卒

魏徵

正日臨朝應詔詩云百靈待軒后萬國會塗山豈如今  
睿哲邁古獨光前聲教溢四海朝宗別百川鉉洋鳴玉  
珮灼爍耀金蟬淑景輝雕輦高旌揚翠煙庭實超王會

廣樂盛鈞天既傾東日戶復詠南風篇願奉光華慶從  
斯億萬年

出關作云中原初逐鹿投筆試戎軒縱橫計不就慷慨  
志猶存杖策謁天子驅馬出關門請纓係南越憑軾下  
東蕃鬱紆陟高岫出沒望平原古木吟寒鳥空山啼夜  
猿既傷千里目還驚九逝魂豈不憚艱險深懷國士恩  
季布無二諾侯嬴重一言人生感意氣功名誰復論  
徵字玄成魏州人相太宗致太平天下既治懼帝喜武  
功嘗賦詩曰終藉叔孫禮方知皇帝尊帝曰徵言未嘗  
不約我以禮徵亡帝賦詩曰望望情何極浪浪淚空泫



無復昔時人芳春共誰遣

太宗在洛陽宮幸積翠池宴酣各賦一事帝賦尚書曰  
日昃翫百篇臨燈披五典夏唐既逸豫商辛亦流泗恣  
情昏主多克已明君鮮滅身資累惡成名由積善徵賦  
西漢曰受降臨軹道爭長趨鴻門驅傳渭橋上觀兵細  
柳屯夜宴經栢谷朝遊出杜原終藉叔孫禮方知皇帝  
尊帝曰徵言未嘗不約我以禮

揚師道

字景猷清警有才思貞觀十年拜侍中參預朝政後為  
太常卿每與文士宴歌詠自適帝見其詩為謫諷嗟賞  
後賜宴帝曰聞公每酣賞捉筆賦詩如宿成試為朕為  
之師道再拜以選輒成無所竄定一坐嗟伏

春朝閑步詩云偃沐乘閑豫清晨步北林池塘藉芳草  
蘭芷襲幽衿霧中分曉日花裏哢春禽野徑香常滿山  
階筍屢侵何須命輕蓋桃李自成陰  
又秋初夜坐應詔詩云玉琯涼初應金壺夜漸闌蒼池  
流稍滌仙掌露方溥鴈聲風處斷樹影月中寒爽氣長  
空淨高吟覺自寬

賦終南山用風字韻應詔詩云眷言懷隱逸輟駕踐幽  
叢白雲飛夏雨碧嶺冠春虹草綠長楊路花踈五柞宮



唐詩卷四  
登臨日將晚蘭桂起香風

詠硯云圓池類璧水輕翰染煙花將軍欲定遠見棄不應賒

詠飲馬應詔詩云寶馬權奇出未央雕鞍照曜紫金裝  
春草初生馳上苑秋風欲動醉長楊鳴珂屢度章臺側  
細蹀徑向濯龍傍徒令漢將連年去宛城今已獻名王  
詠弓詩云霜重麟膠勁風高月影圓鳥飛隨帝輦鴈落  
逐鳴弦

還山宅詩云暮春還舊嶺徒倚玩年華芳草無行徑空  
山正落花垂藤掃幽石卧柳礙浮槎鳥散茅簷靜雲披

澗戶斜依然北泉路猶是昔煙霞

彈鳴琴詩云北林鵲夜飛南軒月馭進調絃發清徵蕩  
心祛褊悵變作離鴻聲還入思歸引長嘆未終極秋風  
飄素鬢

又詠琴詩云夕擅龍門質孤竦嶧陽名齊娥初發弄趙  
女正調聲嘉客勿遽反繁絃曲未成

詠笙詩云短長挿鳳翼洪細摹鸞音能令楚妃歎復使  
荆王吟切切孤竹管來應雲和琴

詠舞云二八如迴雪三春類早花分行向燭轉一種逐  
風斜



又詠飲馬應詔曰清晨控龍馬弄影出花林躑躅依春  
澗聯翩度碧潯苔流染絲絡水潔寫調音一御瑤池駕  
詎憶長城陰

賦隴頭水云隴頭秋月明隴水帶關城笳添離別曲風  
送斷腸聲映雪峯猶暗乘冰馬屢驚霧中寒鴈至沙上  
轉蓬輕天山傳羽檄漢地急徵兵陣開都護道劍聚伏  
波營於茲覺無渡方共濯朝纓

正月臨朝應詔云皇猷被寰宇端宸厲元辰九重麗天  
色千門臨上春

岑文本

字景仁鄧州人中書侍郎顏師古以譴罷太宗曰朕自  
舉一人乃授文本侍郎專典機要

奉和元日臨朝詩云時雍表昌運日正叶靈符德無三  
代禮功包四海圖喻沙紛在列執玉儼相趨清蹕喧輦  
道張樂駭天衢拂蜺九旗映儀鳳八音殊佳氣浮仙掌  
薰風繞帝梧天文光七政皇恩被九區方陪瘞玉禮珥  
筆岱山隅

奉述飛白書勢詩云六文開玉篆八體曜銀書飛毫列  
錦繡拂素起龍魚鳳舉崩雲絕鸞驚遊霧踈別有臨池  
草恩霑垂露餘



李百藥

字重規定州人隋內史令德林子也翰藻沈鬱詩尤其所長樵斨皆能諷之

正月臨朝應詔詩云化曆昭唐典承天順夏正百樂警軒陛三辰揚旆旌充庭富禮樂高譙齒簪纓獻壽符萬歲移風韻九成

少年詞云始酌文君酒新吹弄玉簫少年不歡樂何以盡芳朝千金笑裏面一搦掌中腰掛冠豈憚宿迎拜不勝嬌寄語少年子無辭歸路遙

郢城懷古云客心悲暮序登墉瞰平陸林澤宵羊絲山

川鬱重複王公資設險名都拒江隩方城款北門溟海窮南服長策挫吳豕雄圖競周鹿大蒐雲夢掩壯觀章華築人世更不競西師日侵虜運圯屬驅馳時屯恣敲朴莫救夷陵火無復秦庭哭鄢郢遂丘墟風塵俄塲蹟狐兔時遊踐霜露日霑沐釣渚故池平神臺層宇覆陣雲埋夏首窮陰慘荒谷悵矣舟壑遷悲哉年祀倏雖異三春望終傷千里目

百藥七歲能屬文齊中書舍人陸又嘗過其父德林有說徐陵文者云藉瑯琊之稻坐客並不識其事百藥進曰傳稱鄙人藉稻注云鄙國在瑯琊開陽縣人皆驚喜



云此兒即神童百藥幼多疾祖母以百藥為名名臣之  
子才行相繼四海名流莫不宗仰藻思沉鬱尤長五言  
雖樵童牧子亦皆吟諷及懸車告老怡然自得穿池築  
山文酒譚詠以盡平生之志年八十五先是太宗帝京  
篇手詔曰卿何身之老而才之壯齒之宿而意之新乎  
子安期永徽末遷中書舍人自德林至安期三代掌制  
誥安期孫義仲又為中書舍人

出譚  
實錄

### 來濟

揚州人父護兒貞觀十八年初置太子司議即高其選  
以濟為之永徽中為相世謂護兒兒作相世南男作臣

是也濟出王關絕句云歛轡遵龍漠銜悽度玉關今日  
流沙外垂涕念生還

太宗餞中書侍郎來濟詩云曖曖去塵昏灞岸飛飛輕  
蓋指河梁雲峯衣結千重葉雪岫花開幾樹粧深悲黃  
鶴孤舟遠獨歎青山別路長聊將分袂露襟淚還用持  
添離席觴

### 長孫無忌

無忌嘲歐陽詢形狀猥陋云聳膊成山字埋肩畏出頭  
誰家麟閣上畫此一獼猴詢應聲曰索頭連背暖漫襦  
畏肚寒抵綠心渾渾所以面團團太宗笑曰詢殊不畏



皇后耶太宗嘗謂唐儉酒杯流行發言可喜是時天下  
初定君臣俱欲無為酒杯善謔理亦有之高宗雖不君  
然亦深察事機當時諸王鬪鷄王勃在沛王府戲為文  
檄英王鷄帝見之大怒曰此殆交結之漸即日竄勃以  
太宗之賢杯酒一時之樂何足為後世戒及其弊也中  
宗詔群臣曰天下無事欲與群臣共樂於是迴波艷辭  
妖冶之舞作於文字之臣而綱紀蕩然矣創業之難也  
一觴一詠足以肇亂况其甚焉者哉

杜正倫

相州人工屬文嘗與中書舍人董思恭夜直論文思恭

歸謂人曰與杜公評文今日覺吾頗進顯慶初為相  
侍宴北門詩云大君端袂暇睿賞狎林泉開軒臨禁籞  
藉野列芳筵參差歌管颺溶曳羽旗懸玉池流若釀雲  
閣聚非煙湛露晞堯日薰風入舜絃大德侔玄造微物  
荷陶甄謬陪瑤水宴仍廁栢梁篇闕名徒十月鄒辯詎  
談天既喜光華旦還傷遲暮年猶冀升中日簪裾奉肅  
然闕名徒十月  
疑以傳疑

馬周

凌朝浮江旅思詩云太清上初日春水送孤舟山遠疑  
無樹潮平似不流岸花開且落江鳥沒還浮羈望傷千



里長歌遣四愁

周字賓王博州人嗜學善詩春秋天資曠邁武德中補州助教不治事刺史達奚怒數咎責周乃去客密州趙仁本高其才厚以資使入關留客汴為浚儀令崔賢所辱遂感激而西至長安客常何家貞觀五年太宗召之後為中書令

李義府

遙叙封禪詩云天齊標巨鎮日觀啓崇祠岩峩臨渤澥隱嶙控河沂建岳誠為長升功亮在茲帝猷符廣運玄範暢文思飛聲總地絡載化撫乾維瑞策開珍鳳禎圖

薦寶龜東后方肆觀西都尊六師肅駕移星苑揚罕馬風司沸鼓喧平陸凝蹕靜通達汶陽馳月羽蒙陰驚電輜巖花飄曙輦峯葉蕩春旗石闕環藻衛金壇映黼帷仙階溢秘秬靈檢耀祥芝三始貽遐貺萬歲受重釐菲質陶恩獎趨迹奉軒墀觸網淪幽裔乘徼限明時周南昔已歎邛西今復悲

詠鸚鵡詩云率弋辭重海觸網去層巒戢翼雕籠際延思彩霞端慕侶朝聲切離群夜影寒能言殊可賞相助憶長安

高宗朝義府常賦詩曰鏤月為歌扇裁雲作舞衣自憐



迴雪影好取洛川歸有素強尉張懷慶好偷竊名士文章乃為詩曰生情鏡月為歌扇出性裁雲作舞衣照鑑自憐迴雪影未時好取洛川歸時人為之語曰活剝張昌齡生吞郭正一

義府初遇以李大亮劉洎之薦太宗召令詠烏義府曰  
黑裏颺朝彩琴中聞夜啼上林如許樹不借一枝棲帝  
曰與卿全樹何止一枝

義府擅殺寺丞畢正義王義方彈義府疏云臣聞履霜  
堅冰積小成大請乞重勘當畢正義致死之由雪冤氣  
於幽泉誅姦臣於白日對仗叱義府不退我方三叱上

既無言義府趨出義方乃讀彈文義府善柔成性佞媚  
為心昔事馬周分桃見寵後交劉洎割袖承恩生其羽  
翼長其光價因緣際會遂階通達不能盡忠端節對揚  
王休策蹇勵鷲祇奉皇春而反憑附城社蔽虧日月請  
託公行交遊群小貪治容之好原有罪之淳于恐漏洩  
其謀殞無辜之正義雖挾山超海之力望此猶輕迴天  
轉日之威方斯更劣此如可恕孰不可容金風戒節玉  
露啓途霜簡與秋典共清忠臣將鷹鷂並擊請除君側  
少益鴻私碎首玉階庶明臣節伏請付法推斷以申典  
憲



義府其先瀛洲人與來濟俱以文翰顯時稱來李永徽  
六年為相王義方庭劾之帝陰德義府故貸不問為抑  
義方逐之俄進中書令後以罪流振州朝野相賀

陳子良

詠雪云光映粧樓月花承歌扇風欲妬梅將柳故落早  
春中

七夕看新婦隔巷停車詩云隔巷遙停憶非復為來遲  
只言更尚淺未是渡河時

得妓詩云微雨散芳菲中園照落暉絳樹搖歌扇綠珠  
飄舞衣繁絃調對酒雜引動思歸愁人當此夕羞見落

花飛

新宮詞云春色照蘭宮秦女且窻中柳葉來眉上桃花  
落臉紅拂塵開扇匣卷帳却薰籠衫薄偏憎日裙輕更  
畏風

子良吳人與蕭德言庾抱同為太子學士貞觀六年卒

杜之松

和衛尉寺柳詩云漢將本屯營遼河有戍城大夫曾取  
姓先生亦得名高枝拂遠鴈踈影度遙星不辭攀折苦  
為入管絃聲

之松貞觀中為河中刺史荅王績詩云辱書知不降顧



歎恨何已僕幸恃故情庶迴高躅豈意康成道重不許  
太守稱官老萊家居羞與諸侯為友延佇不獲如何如  
何竒跡獨全幸甚幸甚敬想結廬入境植杖山阿林壑  
地之所豐煙霞性之所適蔭丹桂藉白茅濁酒一杯清  
琴數弄誠足樂也此真高士何謂狂生僕憑藉國恩濫  
尸貴部官守有限就學無因延頸下風我勞何極前因  
行縣實欲祇尋誠恐燉煌孝廉守琴書而不出酒泉太  
守列鍾鼓而空還所以遲迴遂攬轡也僕雖不敏頗識  
前言道既知尊榮何足恃豈不能正平公之坐敬養亥  
唐屈文侯之膝恭師子夏雖齊桓德薄五行無疑范睢

夸人一來何損蒙借家禮今見汝尋微而精簡而備誠  
經傳之典畧閨庭之要訓也

雖夸人疑以傳疑

崔善為

呂才序王無功文集云君河中有渚田十數頃又有隱  
士仲長子光服食養性君遂結廬河渚貞觀中京兆杜  
之松清河崔善為繼為州刺史皆召之君曰柰何坐召  
君平邪

答無功冬夜載酒鄉館詩云頌條忝貴郡懸遲久相望  
處士同揚鄭邦君謝李彊詎知方擁篲逢子敬惟桑明  
朝蓬戶側會自謁任棠



答無功九日詩云秋來菊花氣深山客重尋露葉疑涵  
玉風花似散金摘來沉流酒獨坐即徐斟王弘貪自醉  
無復覓楊林

善為貝州人武德中歷尚書左丞諸曹吏惡其聰察嘲  
其短偃曰崔子曲如鈎隨例得封侯體上全無頂骨前  
別有頭高祖勞之曰齊末姦吏歌斛律明月高緯昏不  
察至滅其家朕雖不德幸免是下令求謗者謗遂止卒  
於秦州刺史

王績

晚年叙志示翟處士正師云  
蕭蕭慕奇調無事不無倫

望氣登重閣占星上小樓明經思待詔學劍覓封侯棄  
繻頻北上懷刺幾西遊中年逢喪亂非復昔追求失路  
青門隱藏身白社遊風雲私所愛屠博暗為儔解紛曾  
霸越釋難頗存周晚歲聊長想生涯太若浮歸來南畝  
上更坐北溪頭古岸多盤石春泉足細流東隅誠已謝  
西景懼難收無謂退耕近伏念已經秋庚桑逢處詭陶  
潛見人羞三晨寧舉火五月鎮披裘自有居常樂誰知  
身世憂

建德破後入長安詠秋蓬示辛學士云遇坎聊知止逢  
風忽未歸孤根何處斷輕葉強能飛辛荅云託根雖異



所飄葉早相依因風若有便更共入雲飛不知辛氏之名今錄于此

古意云幽人在何所紫巖有仙躅月夜橫寶琴此外將

安欲材抽嶧山幹微點崑丘玉漆抱蛟龍唇絲纏鳳凰

足前彈廣陵罷後以光明續百金買一聲千金傳一曲

世無鍾子期誰知心所屬又竹生大夏溪蒼蒼富奇質

綠幹吟風勁翠葉犯雪密霜霰封其柯鴛鴦食其實寧

知軒轅後更有伶倫出刀斧俄見尋根株坐相失裁為

十二管吹作雄雌律有用雖自傷無心復招疾不如山

上草離離保終吉又寶龜尺二寸由來潛深水浮游五

湖內宛轉三江裏何不深復深輕然至溱洧溱洧源疏

狹春秋不滿軌漁人逝往還網罟相縈蟲一朝去運會

剝腸流血死豐骨輸廟堂鮮臙籍籩簋棄置誰怨尤自

我招此否餘靈寄明卜復來欽所履又松生北巖下由

來人徑絕布葉稍雲煙挿根擁巖穴自言生得地獨負

凌雲潔何時畏斤斧幾度經霜雪風驚西北枝電隕東

南節不知歲月久稍覺枝幹折藤蘿上下碎枝幹縱橫

裂行當糜爛盡共坐灰塵滅寧關匠石顧豈為王孫折

盛衰自有時聖賢未嘗屑寄言悠悠者無為嗟大耋又

桂樹何蒼蒼秋來花更芳自言歲寒性不知露與霜幽

人重其德徒植臨前堂連蟠八九樹偃蹇二五行枝枝



自相糺葉葉還相當去來雙鴻鵠棲息兩鴛鴦榮蔭誠  
不厚斤斧亦勿傷赤心許君時此意那可忘又彩鳳欲  
將歸提羅出郊訪羅張大澤已鳳入重雲颺朝栖崑閬  
亦夕飲蓬壺漲問鳳那遠飛賢君坐相望鳳言荷深德  
微禽安足尚但使雛卵全無令繒繳放皇臣力牧舉帝  
樂簫韶暢自有來巢時明年阿閣上

春日詩云前旦出園遊林華都未有今朝下堂來池冰  
開已夕雪被南山梅風催北庭柳遙呼竈前妾却報機  
中婦年光恰恰來滿甕營春酒

績字無功絳州人兄通大儒也績誕縱與李播呂才善  
大業末仕為六合丞嗜酒不任事因解去居河渚間與  
仲長子光友以周易老子置床頭他書罕讀也著五斗  
先生傳醉鄉記無心子傳豫知終日自誌其墓自號東  
臯子



唐詩紀事卷第四

唐詩紀事卷第五

蕭德言

顏師古

杜淹

裴守真

胡元範

元萬頃

李敬玄

張文琮

薛昶惑

張大安

薛元超

鄭蜀賓

王德真

楊思玄

鄭義真

徐珩

蕭翼

弘執恭

鄭軌

王勣

竇威

蕭德言

詠舞詩云低身鏘玉佩舉袖拂羅衣對簷疑鷺語映雪似花飛



德言字文行貞觀中爲弘文館學士兼侍讀以年老致仕太宗不許詔曰天下無事方欲建禮作樂偃武脩文卿年齒已衰教將何恃所冀才德猶茂臥振高風使濟南伏生猶在茲日拜祕書少監

顏師古

奉和正日臨朝云七政璿衡始三元寶曆新負展延百辟垂旒御九宮肅肅皆鴛鴦濟濟盛簪紳天涯重致譯日域獻奇琛

師古字籀自之推以來居關中性簡峭自負其才意望甚高終於祕書監諫議大夫相時其弟也師古叔父遊

秦武德初刺廉州州人歌曰廉州顏有道性行同莊老愛人如赤子不殺非時草高祖璽書勞勉之

杜淹

杜淹始見袁天綱於洛天綱謂曰蘭臺成就學堂寬廣又語曰二十年外終恐責黜暫去卽還武德六年以善隱太子俱配流雋州淹至益州見天綱曰洛邑之言何其神也天綱曰不父卽回至九年六月召入天綱曰杜公至京卽得三品要職淹至京拜御史大夫檢校吏部尚書贈天綱詩曰伊呂深可慕松喬定是虛繫風終不得脫屣欲安如且珍紉素美當與薜蘿踈旣逢揚得意



非復又閑居

淹字執禮隋時隱太白山文帝惡之謫戍江表秦王引  
入爲天策府曹參軍賦詩尤工賜金鍾楊文幹反辭連  
太子歸罪淹流雋州太宗踐阼召爲御史大夫後檢校  
吏部尚書參預朝政卒

裴守真

和太子納妃詩曰瑜珮升青殿穠華降紫微還如桃李  
發更似鳳凰飛金屋貞離象瑤臺起婺徽絲纓紛碧坐  
績羽泛綸衣雲路移雕輦天津轉明鏡仙珠照乘歸寶  
月重輪映望園喜宴洽王第懽娛盛絲竹揚帝薰簫箏

奉宸慶襲雲謁曉光湛露晞朝陽天文大景麗容藻磨  
詞芳玉庭散秋色銀宮生夕涼太平起邃古萬壽樂無  
疆

守真絳州人高宗時太常博士天授中爲司憲府丞  
數詔獄多裁恕不合武后旨出刺成州徙寧州卒

胡元範

奉和太子納妃詩云帝子威儀絕宮妃禮慶優疊鼓陪  
山觀凝笳翼畫軒鬱鬱神香滃奕奕彩雲浮排空列錦  
蜀勝觀溢皇州金閨未息火玉樹鍾天愛月路飾還裝  
星津動婦珮紫極流宸眷清規佇慈誨恩波洽九流光



唐詩紀事卷五  
暉軼千載側席詔親賢式宴坐神仙聖文飛聖筆天樂  
奏鈞天曲池涵雅景文字孕祥禋小臣同百獸率舞悅  
堯年

高宗子洪為太子納妃有司奏贄用白鴈適苑中獲之  
帝喜曰漢獲朱鴈為樂府歌今得白鴈為婚贄婚乃人

倫首我則為慙太子後謚  
孝欽皇帝

裴炎請武后歸政后以炎有異圖捕送詔獄元範為鳳  
閣侍郎曰炎有功於國臣明其不反后曰炎有反端顧  
卿未知耳元範曰若炎反臣輩亦反矣曰朕知炎反卿  
輩不反遂斬炎

元範申州義陽人介廉有才以炎故流死雋州

元萬頃

春日池臺詩云日影飛花殿風紋積翠池鳳樓通夜敞  
虬輦望春移

春日詩云花輕葉亂仙人杏葉密鸚鳥喧帝女桑飛雲閣  
上春應至明月樓中夜未央又曰鳳輦迎風乘紫閣鸞  
車避日轉彤闈中堂促管淹春望後殿清歌開夜扉  
奉和太子納妃公主出降詩云離元應春夕帝子降秋  
期鳴瑜合清響冠玉麗濃輝和聲躋鳳掖清影步鸞墀  
從李勣征高麗為遼東道管記勣令別將赴平壤糧不



唐詩紀事卷五  
及期萬頃作離合詩密報勣勣曰軍機切遽何以詩爲  
欲斬之言狀乃免勣令作文檄高麗其語有不知守鴨  
渌之險莫離支報云謹聞命矣遂移兵鴨渌軍不得入  
萬頃坐是流嶺外遇赦還爲北門學士累遷鳳閣侍郎  
坐事誅

李敬玄

奉和別魯王詩云綠車旋楚服丹蹕佇秦川珠臯轉歸  
騎金岸引行旂一朝限原隰千里間風煙鸚喧上林右  
鳧響御溝前斷雲移魯蓋離歌動舜絃別念凝神展崇  
恩洽玳筵顧惟慙叩寂徒自仰鈞天

又奉和別越王詩云飛蓋迴蘭坂宸襟佇栢梁別館分  
涇渭歸路指衡漳關山通曉色林籞徧春光帝念紆千  
里詞波照五潢

敬玄亳州人該覽群籍尤善於禮高宗在東宮馬周薦  
其材召入宗賢館侍讀後相高宗儀鳳中劉仁軌奏河  
西鎮守非敬玄不可帝強遣之由是大敗於湟川魯王  
靈夔高祖子也歷五州刺史越王正太宗子武后時爲  
豫州刺史

張文琮

水詩云標名資上善流派表靈長地圖羅四瀆天文載



五潢方流涵玉潤圓折動珠光獨有蒙園吏棲偃觀濠  
梁

賦橋詩云造舟浮渭日鞭石表秦初星文遙瀉漢虹勢  
尚凌虛已授文成履空題武騎書別有臨濠上棲偃獨  
觀魚

和陽舍人詠中書有花樹詩云初葉映素叢參差間早  
紅因風時落砌雜雨乍浮空影照鳳池水香飄鷄樹風  
豈不愛攀折希君懷袖中

文琮同潘屯田冬日早朝云假寐懷古人夙興瞻曉月  
通宸禁門啓冠蓋趨朝謁霜霽清九衢霞光照雙闕紛

綸文物紀爛煥聲明發腰劔動陸離鳴玉和清越

文琮高宗宰相文瓘弟也貝州人好自寫書貞觀中爲  
治書侍御史永徽末拜戶部侍郎出爲建州刺史卒

文琮賦蜀道難云梁山鎮地險積石阻雲端深谷下寥  
廓層崑上鬱盤飛梁架絕嶺棧道接危巒攬轡猶長息  
方知斯路難

薛春感

進船於洛水詩云禁園紆睿覽仙棹叶宸游洛北風花  
樹江南彩畫舟榮生蘭蕙草春入鳳凰樓興盡離宮暮  
煙光起夕流



世傳春感善投壺背後執矢投之龍躍隼飛百發百中

張大安

奉別越王詩云盛藩資右戚連萼重皇情離襟愴睢苑  
分途指鄴城麗日開芳甸佳氣積神京何時驂駕入還  
見謁承明

越王太宗子武后時爲豫州刺史大安公謹之子上元  
中同中書門下三品章懷太子令與劉納言等共註范  
曄漢書太子廢故貶晉州刺史終橫州司馬

薛元超

和向太子監守違戀詩云儲禁銅扉啓宸行玉輅遙空

懷壽街吏尚隔寢門朝北首瞻龍戟塵外想鸞鑣飛文  
映仙榜瀝思叶神飈帝念紆蒼陸乾文煥紫霄端墉橫  
筆海平園振詞條欲應重輪曲鏘洋韻九韶

元超收之子也高宗時爲給事中書舍人薦士若任希  
古郭正一崔融等皆以才自名上元初同中書門下三  
品政出武后因陽暗乞骸骨卒

高宗爲太子也元超爲舍人太宗親征時元超韓王元  
嘉同太子監守賦違戀詩

鄭蜀賓

蜀賓滎陽人善五言年老爲江右一尉親朋餞於上東



門蜀賓賦詩曰畏途方萬里生涯近百年不知將白首  
何處入黃泉酒酣詠歌聲調哀戚竟卒於官時長壽中  
也

王德真

和過溫湯詩云握圖開萬寓屬聖啓千年驟阜疏緹騎  
驚鴻映綵旃玉霜明鳳野金障藻龍川祥煙聚危岫慶  
水溢飛泉停輿輿睿覽還舉大風篇

德真武后時爲納言房先敏以罪貶訴于相府內史騫  
味道曰太后旨劉禔之曰乃上從有司所奏云后聞貶  
味道而以禔之爲忠臣德真推順曰戴至德無異才惟

能歸善於君爲時所服后曰善

揚思玄

湯泉詩云豐城觀漢迹溫谷幸秦餘地接幽王壘塗分  
鄭國渠風威肅文衛日彩競雕輿遠岫凝氛重寒叢樹  
影踈迴瞻建章闕佳氣滿宸居

奉和別魯王詩云元王詩傳博文后寵靈優未若動宸  
眷龍章送遠遊潼關踈別道灞岸引行舟北林分苑樹  
東流溢御溝鳥聲含吹咽騎影曳花浮聖澤九垓遍天  
文七曜周方翹獻雅樂簪帶奉鳴球

高宗時人



鄭義真

温湯詩云洛川方駐蹕豐野暫停鑾湯泉常獨涌温谷  
豈知寒漏鼓依巖畔相風出樹端嶺煙遙聚草山月迥  
臨鞍日用誠多幸天文遂仰觀

高宗時人

徐珩

日暮望涇水詩云導源經隴阪屬洎貫羸都下瀨波常  
急迴圻溜亦紆毒流秦卒斃泥糞漢田腴獨有迷津客  
懷歸輒暮途

高宗時人

蕭翼

太宗以翼爲監察御史充使取羲之蘭亭序真蹟於越  
僧辯才翼初作北人南遊一見款密留宿設缸面酒江  
東缸面猶河北曰甕頭盖初熟酒也酣樂之後探韻賦  
詩才探來字詩云初醞一缸開新知萬里來披雲同落  
莫步月共徘徊夜久孤琴息風長旅鴈哀非君有秘術  
誰照不燃灰翼探招字詩云邂逅欵良宵殷勤荷勝招  
彌天俄若舊初地豈成遙酒蟻傾還泛心援蹠似調誰  
憐失群翼長若風飄旣而以術取其書以歸世本名  
南部新書曰蘭亭序武德四年歐陽詢就越詐求之始



入秦王府麻道嵩奉教搦兩本一送辯才一王自收道  
嵩私搦一本貞觀二十三年褚遂良請入昭陵

弘執恭

和平凉公觀趙郡王妓詩云小堂羅薦陳妙妓命燕秦  
翠眉疑假黛紅臉自含春合舞俱迴雪分歌共落塵齊  
竽不可厠空願上龍津

賦劉生云英名振關右雄氣逸江東遊俠五都內來去

三秦中劍照七星影馬控千金驄縱橫方未息因茲定

武功劉生不知何代人齊梁以求歌為三秦遊俠

鄭軌

觀兄弟同夜成婚詩云棠棣開雙萼天桃照兩花分疑  
含珮響隔戶偶粧華迎風俱似雪映綺共如霞今宵二  
神女併在一仙家

王勣

詠妓詩云妖姬飾淨粧窈窕出蘭房日照當軒影風吹  
滿路香早時歌扇薄今日舞衫長不應令曲誤持此試  
周郎

勣武德正觀間人有集五卷

竇威

出塞曲云匈奴屢不平漢將欲橫行看雲方結陣却月



始連營潛軍度馬邑揚旆掩龍城會勒燕然石方傳車  
騎名

威字文蔚沈邃有器局貫覽群言諸兄詆為書疑武德  
初為內史令

唐詩紀事卷第五





